

# FASNACHTOLEAKS





## SPY-APP

Fir alli Hobby-Spiönli



Dä App koschtet di Verstand  
und dr Dateschutz sämtligi Närke



### Beschrybig:

Wenn de wisse wotsch wär was iber di waiss und wär was iber di het wisse welle und du wisse wotsch worum was wär iber di will wysse.

# SPYTEX



Kasch dy Drummlle ('s Inschtrumänt nit dr Ranze) nimme  
sälber draage?



Pfyffsch us em letschte Loch?  
Denn bruchsch dringend und scho fir  
die näggschti Fasnacht: Spytex  
Mir sin fir alli hilfsbedirftige Fasnächt-  
ler do:

- Mir filze dy Bier
- Mir entgrampfe dyni Grampfodere
- Mir falle dir in Rugge
- Mir lehn di sicher lo hängge
- Mir bringe di uff 's Hörnli (aber  
nimme zugg)

# SPY & SPY

WINCKI

WINCKI



HMMMM



SCHLYCH SCHLYCH



HI HI HI

WUSCH



**SPY & SPY**





# SPY....ÜBEL

Dr George Orwell sait 's ganz grass:

Big Brother he is watching us.

Bstellt in Lybie ain e Kaffi

und haisst dummerwyys Ghadaffi,

het dr Kim Jon Un grad Mumm

und bringt wiider Hundert um

oder sait d'Angie ihrem Maa:

„Ich sott e Hoseaazug ha!“

Denn waiss das dangg dr NSA,

zytglych jede z'USA.

D'Wält die isch, es isch e Fluech,

hitt e groosses offes Buech.

's Wort Ghaimnis, das isch hitt jo 's schlimme,

exischtiert ab sofort nimme.

Dangg Twitter-Gwitter, Cyberspace,

git's no place for human race,

wo me sich imene doote Egge

infomässig ka verstegge.

's wird observiert und spioniert,

Infiltriert und archiviert.

Das bassiert nit nur z'America,

das kasch au bi uns do ha.

Syg's im Bundeshuus in Bärn,

bi dr UNO z'Gänf, dert bsunders gärn.

Au z'Bäle lokal, es isch fatal,

isch 's Iberwache stinggnormal.

Mir sin beflisse ganz gnau z'wisse

weele Banggroot wie duet bschysse,

weele Regierigsroot wo aane fliegt,

weele Verwaltigsroot was griegt und liegt,

uf weeles Konto was duet ko,

ob är 's Wieso au duet verstoh

und wär bi dr BVB, o wee,

was het gwisst und nit will gsee.

Aber nit nur die Groosse, au die Glaine,

sin jetz Opfer, das isch 's gmaine.

Git dr Hassan do sym Schatz

e Schmatz, z'mitz uf em Claraplatz,

näbem Stand, es isch e Schand,

wo me dir e Hasssschrift druggt in d'Hand

(dr Morin syg nit informiert,

het me uns do suggeriert).

Denn heert das ain z'America

im Headquarter vo dr NSA.

Dert kunnt dä Schmatz, das deent jetz grangg,

in d'top secret Daatebangg,

wo alli Schmatz sin regischtriert

und derte wird är dechiffriert.

Denn wird gluegt, es kennt aim gruuse,

eb bi dr NPD ain glych duet schmuuse,

eb bi dr Al Kaida aine isch

mit em glyche Speichelgmisch.

Eb bi dr ETA oder PKK

het ain die glychi DNA

und eb in Guantanamo ain sitzt

wo glych wie unsre Hassan schwitzt.



Au d'Fasnacht blybt do nit verschoont,  
vyl isch si sich jo scho gwoont.  
Aber dass, zem Wohl vo alle,  
jetz 's Sujetghaimnis no duet falle,  
raizt si, 's isch nit guet, uf 's Bluet.  
's lipft ere dr Fasnachtshuet vor Wuet.  
Derby goots nit um Gäld, um Ruum, um Lob,  
d'Motiv, die sin ganz philantrop.  
D'Menschhait uf em Ärdgrais  
ka nur läbe, wenn si alles waiss.

Dr Snowden het is orientiert,  
wie d'Wält hitt wirgglig funggzioniert.  
In de Wyte do vom worldwideweb  
findet alles hitt e jeede Debb.  
Dang Tweeds, Lassange und Wikileaks  
wisse alli Infofreaks  
wievyl User uf dr Wält  
sin Looser in Bezug uf Gäld.  
Wär weeli Waffe do im Nooche Oschte  
wo duet boschte, was si koschte.  
Wievyl Greenpeace-Aggtivischte  
frischte 's Läbe in dr Kischte.  
Wievyl Pussy Riots do  
losst me wäge Sotschi go.  
Wo wärde d'Menscherrächt verletzt,  
wievyl Staate sin vernetzt entsetzt  
und hänn si z'Afghanischtan und im Iran  
jetz ändlig WLAN au fir d'Taliban?  
Frooge, Frooge iber Frooge,  
wo d'Worldcommunity so blooge.

Dä Infoshitstorm, dä isch gsteert,  
mir fordere, dass das jetz ufheert.  
Mir hänn jetz gnue, leend is in Rueh!  
Ab sofort loose mir nimm zue.  
Brichtet was und wo ihr wänd,  
mir sin inforesischtänt.  
Mir bruuche nimme mee so Kicks  
uf eyre Clips git's kaini Klicks.  
Will, ains isch glaar, git's do kai Märt,  
denn sin die Infos nyt mee wärt.


Drum kennet ihr uns kryz und quer.  
Habe fertig, Flasche leer.







# MIR BRINGES UFF E PUNGGT:



37 • 33 • 31 • 27  
 • 34 • 28  
 • 35 • 29  
 • 30

Isch er nit härzig unsere Spy? So vertrauenserweckend, so liebenswärt, so charmant? Mecht me ihm nit grad alli syni Ghaimnis verzelle?

# SUECHBILD



Die ganzi Stadt isch empeert. Alle Raucherbeize stinggts gewaltig. D'Wirt qualme vor Wuet und d,Raucher au. Unsere Spy het sich uff d'Suechi gmacht, eb's nit doch no irgend ai Lokal git z'Basel, wo sich geege die radikali Gsetzeswuet ufflähnt und dr Widerstand usrief. Är isch au tatsächlich findig worde wien ihr gsehnt und het e Beiz entdeggt, wo dr Wessels mit sym Staalgebber nit aane kunnt. Dr Raucher-Spy zaigt ganz dytlig, was är vo däm Gsetz haltet. Findsch du syni elf Mirstinggtsganzgewaltigfinger?



**SPY & SPY**







# SPY & SPY

[HTTP: FASNACHTSLEAKS.ORG/](http://fasnachtsleaks.org/)



MIRVERROOTEALLISUJETSWOMIRWISSE AM LAADE



# Psssssssst! GSUECHT: Nochwuchsspioon ab 8 Joor

Mir sueche männligi Nohwuggspiönli wo wänn drummle oder pfyffe leere. Du muesch 8 Joor alt sy, muesch iber Durchhaltewille verfiage und Luscht ha Fasnacht z'mache mit uns. Wenn du Luscht hesch zuen is z'ko, denn kumm am

**Samschtig, dr 22. Merz 2014 zwischen em Zähni und Elfi am Morge ins Rest. Rähhuus an dr Riechedoorstr. 11 z'Basel.**



Alli ghaime Spionageinformazione bikunnsch vom Setzligobmaa Daniel Forster, Am Stausee 8, 4127 Birsfelden, 079 471 92 47.



D'Ladärne-Uusstellig uff em Minschterblatt und Wääge-und Reggwisyte-Uusstellig bi dr Kasärne sin allewyl no vom Mäntig znacht bis am Mitwuch demorge ! Dert und an drei Verkaufsständ ( CINS ) in dr Stadt ka me au alli Zeedel und Schnitzelbängg, d'Blaggedde und dr Rädäbäng kaufe



's goldige Rääpli schigg e SMS mit em Inhalt „Waage ( Nr.)“ an d'Nummere 9234

## IMPRESSUM

Bild: Exdärne C Spy (Diamantenfieber / Diamonds Are Forever)  
Täggscht: Intärne B Spy (in tödlicher Mission / For Your Eyes Only)  
Drumunddra: Under Cover W Spy (Im Geheimdienst Ihrer Majestät)  
Konzäpt: B Spy vs C Spy  
Ufflaag: Allewyl no z'vyl  
Drugg: Schwarzdrugg  
Erschynt: Nit so vyl



## ***Fir Männer und Buebe ab 8 Joor***

### **Aignigstescht:**

Mir sueche Nochwuchsspy. Bisch du kurzsichtig,  hesch e Brätt vor em Kopf,  bisch intrigant,  iberwachs ch gärn dy Nochber  und hesch e Kontrollwaan,  denn bisch du unsere Maa. Mach dr Aignigstescht und mäld di sofort a:

**1. E guete Frind verzellt dir e Gheimnis wo de niemerem derfsch wyter verzelle. Was machsch?**

a)  Du stellsch das Gheimnis uff Facebook b)  Du verdiensch Fr. 100.—als Bliggreporter c)  Du saisch es nur dym beschte Frind (wo's niemerem derf verzelle)

**2. Dr Bligg schrybt e Artiggel über das Gheimnis und dy Frind stellt di zur Reed. Was machsch?**

a)  Isch das wirglic so ghaim gsi? b)  Ich ha no gsait, är derf das niemerem saage. c)  Dr Bligg schrybt kaini Artiggel. Fangfroog.

**3. Weeles isch dy Lieblingsfilm?**

a)  Der Spion der mich liebte b)  der Spion der aus der Kälte kam c)  das Schweigen der Ämter